

Vun driweriwer

erscheint auf www.lenauheim.de

monatliche
Erscheinung

Dezember 2024

von Helen Alba

„Weihnacht, wie bist du scheen...“

So war des vor langer Zeit

Obzwar ich noch e Kind war, han ich domols gspiirt, dass etwas Besonderes uf uns zukummt. Natierlich han ich ufs Chrischtkindl gewart.

Im Dorf ware die Mensche voller Erwartung, mer hat doch so manches gebraucht, was nit immer in de Gschäfte zu kaafe war. Wann awer in der Alimantara de Vetter Hans un sei Bäsl Klari, die Verkeifer, de Leit zugepischpert han: morje kumme Bumrantsche un Feije; mir warte ach uf de Franzlzucker un Vinga-Tschokoladi; Gerwe were ach sicher kumme, dass der Kranzkuche backe kennt - dann is des wie e Laaffeier dorchs Dorf gang. Un wann de Eisegschäfts-Lița noch angsaat hat, dass e Auto mit Tannebääm schun ufm Wech is, ware die Mensche froh. Manche sin trotzdem noch in die Stadt, uf Temeschwar, inkaafe gfahr, weil dort doch e greesseri Auswahl war, iwerhaupscht was die Gschenker betroff hat.

Un so is de 24. Dezember, de Heiliche Owet, schneller wie gedenkt angerickt. Noh em Mittachesse han mei Schwester un ich immer zur Oma un zum Ota gehn misse. Mir were jo lieber derhem geblieb, um jo nit zu verpasse, wann es Chrischtkindl kummt. Doch wann die Eltre gsaat han: je mit eich zur Oma - do han mer scheen gfolcht un sin gang. Die Oma hat doch so scheen vun frieher verzähle kenne, sie ware ihrer siewe Gschwister un do hat es Chrischtkindl halt nor Äppl, Nusse, bissl Bombons un Keks bringe kenne.

Wies duschter gin is, hat die Oma uns hemgfieirt un in der Stub hat de Chrischtbaam gstann. Dran war Franzlzucker, Kerze un farwichi Glaskugle. Die Mutti hat getreescht: Es Chrischtkindl hat halt nit alles uf eemol bringe kenne, es werd gleich mit de Gschenker kumme. Un wirklich, es hat an der Tier gekloppt, es Chrischtkindl hat uns Puppe un Siessichkeite gebrung, mir han gebet un Gedichter ufgsaat. Un ware froh un zufriede. Die Oma is geblieb, mir han spiele derfe, die Eltre sin zur Reih un später in die Mette gang, die Oma hat uf uns owacht gin.

In später Johre, wie ich ach mitgehn han derfe in die Mette, es war scheen, stark ufregend un heemlich. Stille Nacht, des han die Bläser ausm Kercheturm uns mit uf de Hemwech gin. Friede in unsre Herze - so han mer die Weihnachtäch in der Familie verbrung.